



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8 Yangia anidakangma : Tir Yimym tiryimym@aolima tir yimym TAPAK 7

Novak Djokovic-i
Australian Open kokogo

Netanyahu-i prangbong atema
sentong tasen sangdong



VOL. XX NO. 108 (ADOK 108) DIMAPUR TENTONÜ (MONDAY) ANEJETI (JANUARY) 30, 2023 ₹ 5.00

Mezüngbuba Council of Ministers senden amen

New Delhi, January 29, 2023 (Agencies): Parliament nung Budget session amentsüba jangkang Prime Minister Narendra Modi-i Deobarnü council of ministers den senden ka menogo. February 1 nü Parliament nung Union Budget benoktsü lir aser iba ya Centre sorkar atema tatembangba budget asütsü kechiyong 2024 nung general elections agitsü.

Tanü senden nung Cabinet secretary-i 2014 nungi tang tashi nung Modi'er sorkari schemes inyakba aser lemtet agibatam indang osang metetdaksü.

PM Modi-i par minister tem dang sorkar indang schemes nung temulung agütsütsü aser kilen shia atongtsüsa inyaktsü metetdaksü.

Union minister temi middle class kibongtem atongtsü aser

sorkar scheme tem ajanga parnok lenmang balala nung yariba metetdaksütsü atema tetuyuba agütsü.

"Nür ministry ajanga inyakba osang social media ajanga nübertem dang metetdaksütsü. G20 chairmanship ya India atema takok tuluka lir aser G20 summit ajungkettsüla" ta PM Modi-isa ashi.

Paisa council of ministers dang lokti aser sobaliba tsütsü takok angubatem ajungkettsü aser sensakertem asoshi welfare schemes osang prokshitsü ayongzük.

Union Cabinet nung nübo melenshitsü ta jembiba mapang ka aser ano state 9 nung assembly elections agitsü aliba jangkang tanü PM Modi-i Union Council of Ministers senden ayonga menogo. Taküm asoshi iba ya mezüngbuba senden lir.

Beating Retreat 2023 agia R-Day tembangogo

New Delhi, January 29, 2023 (Agencies): Taküm Republic Day benjungmong tembangba tamaittsü Deobarnü Vijay Chowk, New Delhi nung Beating Retreat agiogo.

Iba sentong nung Indian President aser Armed Forces indang Supreme Commander Droupadi Murmu, Prime Minister Narendra Modi aser Defence Minister Rajnath Singh nungertem aden.

Prime Minister Narendra Modi, Defence Minister Rajnath Singh, Chief of Defence Staff General Anil Pandey aser tri-

service chief aseme President Droupadi Murmu pelaa agizükba sülen buglers & massed band ajanga 'Agniveer' tune atem.

Army, Navy, Air Force, State police aser Central Armed Police Force (CAPF) nungi music bands ajanga Indian tunes 29 tashi atem.

Tanü Delhi nung tsüngsang majungba ajanga drones 3,500 amshia drone show ka agitsü aliba magitet. Iba ya India nung 'drone show' tulutiba liasü aser indigenous drones 3,500 amshitsüba liasü.

PM Modi-i Meghalaya nung BJP atema nüboyimtsütsü

Shillong, January 29, 2023 (Agencies): Prime Minister Narendra Modi-i February tanabuba hopta nung Meghalaya nung BJP atema nübo yimtsütsü, ta BJP state unit president Ernest Mawrie-i ashi.

February 27 nü Meghalaya assembly elections atema star campaigners 20 lir aser parnok rongnung Union minister tem-Amit Shah, Rajnath Singh, Smriti Irani aser Nitin Gadkari nung dena lir, ta pai ashi.

Maneni, BJP sorkar aliba state tem nungi Chief minister temia BJP atema nüboyimtsütsü, ta Mawrie-isa shisem.

"PM Modi-i Meghalaya semdangtsüba anogo melemtet saka February 10 sülen pa arutsü. PM Modi-i Meghalaya kübok Khasi, Jaintia aser Garo hill tesem ajungalen election sentongtem nung o jembitsü" ta paisa metetdaksü.

Züngsem 60 agia akümba Meghalaya assembly nung BJP MLA 2 lir saka iba dang nungi teimba kümer taruba sorkar len anitsü atema meranger.

Election Commission-i election agitsü osang

sangoktsüba sülen BJP-i candidate tem tenüng metetdaksütsü ta state party president Mawrie-i ashi.

"Onoki tenüngtem bendenogo aser ibaji Delhi-i yoktsü. Onoki February 2 tashi nung tenüngtem metetdaksütsü akok" ta paisa ashi.

"Onoki tetsür 10 shi shimtsü aser tesüiba dang nungi menden teimba nung takok angutsü. Taoba mapang onoki menden 25 nung ranglok saka tang onoki menden 35 nung temulung agütsü" ta paisa metetdaksü.

"Onoki tanga teloktem den teloktep yanglutsü sentong mali. Election results adokba sülen kasa tangatetba aliba teloktemi ochimashi maliba sorkar akümtsüba sülen anidaktsü asü masü'ar repringdangdi" ta Mawrie-isa ashi.

"Meghalaya nung gari lenmang tia kanga majung lir, nübertemi traffic mesadamba indang teti jembir, medical mesüra engineering colleges mali. Anungji Meghalaya aser Centre nung kasa party kati sorkar yimsü süra item khuret ajak koktetsü" ta paisa metetdaksü.

JD(U)-i Nagaland nung candidate mezüngbuba metetdaksür



Deobarnü Town Hall Dimapur nung JD-U candidate Kitoho S Rotokha-i o jembiba angur.

Dimapur, January 29, 2023 (TYO): February 27 nü Nagaland assembly elections atema Janata Dal-United (JD-U)-i mezüngbuba candidate shimogo.

Deobarnü JD-U-i Ghaspani II constituency nung Kitoho S Rotokha nem ticket agütsüba osang metetdaksü.

Nagaland assembly elections nung political party rongnung Rotokha ya mezüngbuba 'officially declared candidate' lir.

Dimapur town hall nung tanü sentong ka agidang Nagaland JDU president NSN Lotha-i Rotokha shimba osang sangoktsü.

Iba sentong nung JDU national president Rajiv Ranjan Lalan Singh, General secretary & north east in charge Afaque Ahmed Khan, Rajya Sabha MP Aneel Hegde aser Bihar minister Sanjay Kumar nung aden.

Ghaspani II constituency nung voters 29,000 tema lir aser iba constituency nung JDU, Nationalist Democratic Progressive Party (NDPP) aser

Republican Party of India (Athawale) tsüngda tokteptsü ama ajiteter.

Iba sentong nung Rotokha-i o jembidang lanur aser tetsürtem tashi itdaksütsü aser wadang ajaklen terenlok bener arutsü nangzük.

Pai takok ngura mapa mangurtem nem mapa agütsütsü aser piggery, poultry amala industry tem asentenshia lapoktsü ta Rotokha-isa nangzük.

"Central lennirtemi kü dak tamang akaba atema kanga pelar. Nagaland nung JD(U) khuret abentsü nungloktsüba atema pelar aser ni taruba election nung takok ngua party nem tenüng tajung bentsür arutsü" ta paisa ashi.

Pai election atema mapa inyaka arur aser tesüiba ita 8 tashi constituency nung yim daklirtem den ajurutepa sensaksema arur ta paisa shisem.

"BJP sorkari 2018 assembly elections matongdang 'yimten latettsü atema election' ta ser toktep aser iba jagi Nagaland nung alirtemi BJP-i parnok

ashioktsü ama bilemer" ta JDU national president Rajiv Ranjan Lalan Singh-i ashi.

"Nagaland nung alirtemi küm pungu süir ano election ka ajurur anungji Naga yimten latet asü melatet?" ta pai asüngdang.

"Centre sorkari NSCN (IM) den August 3, 2015 nung Framework Agreement sign sütepba mezüngshir. Nagaland nung taruba sorkarji JDU medeni mekümtetsü aser onoki Naga yimten latettsü" ta JDU national president Singh-i metetdaksü.

Iba sentong nung JDU general secretary Khan, MP Hegde, Bihar minister Jha, Nagaland JDU president Lotha aser constituency nung yimtsüng aser lanur lennirtemia o jembi.

"JD(U)-i Nagaland nung candidate kwi shimtsü'ar telemtetba magi lir, ajisüaka JDU president Lotha-i Tyui menden nungi tokteptsü aser iba nung Deputy chief minister aser BJP lennir tejen Y Patton lir" ta Singh-isa metetdaksü.

Rahul Gandhi'er Bharat Jodo Yatra tembangogo

New Delhi, January 29, 2023 (Agencies): Kanyakumari nungi Jammu & Kashmir tashi Rahul Gandhi-i aniba Bharat Jodo Yatra tembangogo.

Deobarnü yatra tembangba anogo nung Rahul Gandhi-i Srinagar nung aliba Lal Chowk City Centre nung linük wako salaogo. Küm 75 tejakdang kasa tesem nung Jawaharlal Nehru-ia linük wako atsüketa liasü.

"India dang nangzükba inyakogo" ta tanü Rahul Gandhi-i Lal Chowk nung linük wako salaba sülen ashi.

Iba mapang Congress lennirtem- Priyanka Gandhi Vadra aser Randeep Surjewala na den aika liasü.

September 7, 2022 nü Bharat Jodo Yatra ya Kanyakumari nungi

tenzük aser January 29, 2023 nü Jammu & Kashmir nung tembang.

Iba yatra ajanga ita pungu majungdang state 12 aser Union Territory 2 süiogo. Bharat Jodo Yatra nung Tamil Nadu, Kerala, Karnataka, Telangana, Andhra Pradesh, Maharashtra, Madhya Pradesh, Rajasthan, Haryana, Delhi, Uttar Pradesh, Punjab, Himachal Pradesh aser Jammu and Kashmir adenogo.

Iba sentong nung yimtenren lennir tongti aikati Rahul Gandhi den külemi jajaogo. Jammu & Kashmir nung Rahul Gadhi'er Bharat Jodo Yatra tatembangba sentong nung PDP tanishir Mehbooba Mufti aser Jammu & Kashmir National Conference lennir Omar Abdullah natia shilem agia liasü.

New Delhi nung actor tejen aser MKM tanishir Kamal Haasan-ia shilem agi aser Maharashtra nung Shiv Sena (Uddhav) lennir Aaditya Thackeray-i Rahul Gandhi den külemi shilem agia liasü.

Yaküm September ita Tamil Nadu Chief Minister aser DMK lennir M. K. Stalin-ia Kanyakumari nung Bharat Jodo Yatra tenzükba sentong nung shilem agi.

Bharat Jodo Yatra mapang lennir aikati Rahul Gandhi den külemi jajaogo aser parnok rongnung taoba RBI governor Raghuram Rajan, actor-filmmaker Pooja Bhatt, Bollywood actor Swara Bhasker, actor tem- Sushant Singh, Rashmi Desai aser Akanksha Puri nung dena lir.



26 Aonglenden Assembly Constituency nungi tokteptsü atema January 29, 2023 nü Wb. Toshipokba Longkumer, Congress telok nung denogo. Pa Congress nung aniokba sentong nung pa den NPCC Working president aser NECCC mendenbuba yariba Wb. Bobby Panicker den Mokochung DCC nung lenirtem noksa nung angur.

Assam CM Himanta Biswa Sarma-i appointment letter 1208 agütsü

Guwahati, Aenjeti/January 29 (Agencies): Health, Home aser Political Department tem nung mapa tazüng aliba süngdaksütsü asoshi Assam Chief Minister Himanta Biswa Sarma-i Honibarnü Guwahati nung candidate 1208 nem appointment letter agüja liasü.

Chief Minister Sarma-i sentong ka nung Health and Family Welfare department atema lanur 1136 aser Home and Political department atema lanur 72 nem appointment letter tem agüja liasü.

Iba sentong nung jembidang Chief Minister Dr. Sarma-i iba anogo ya kanga tongtipang ta ashi, kechiaser state nung lanir

1208 nem Health and Family Welfare Department aser Home and Political Department nung appointment angu.

Health and Family Welfare Department asoshi tashi tulutibaji nübu ya lir aser staff nurse tem mapa nung shimogoba ajanga nüburtem nung healthcare tajung aser jenjang talang nung agütsüba yimya tajungba akumtsü, ta pai ashi.

Dr Sarma-i ashiba agi, küm ka dak alaka 2006 küm nungi pa health department tekolakba sür lia arur.

Grade III aser IV category nung appointment atema tekeratiba nung tatidang ka agütsü aser Health and Family

Welfare Department nung nisung 12,000 shimoktsü, ta Chief Minister-i ashi.

1988 küm nungi telungpur teblemtsü ajanga Assam nung yimjung tsütsü timtema aru, ta pai ashi.

Kuli balala mechi security forces indang kibong 400 dak tema nem obendang agüja mali, ta pai ashi.

Ajisüaka Assam Police indang kibong 422 nungi lanur 72 nem mapa agütsütsü tang aliba cabinet ajanga telemteba agi.

Ano tanungba kibongtem nema sorkar mapa tekeratiba nung agütsütsü, ta paisa shia liasü.

BJP-i menden 48 aser Congress-i menden 13 atema candidate sangdongogo

Agartala, Aenjeti/January 29 (Agencies): Assembly constituency 60 aliba Tripura nung Bharatiya Janata Party (BJP) ajanga candidate 48 tenüng Honibarnü sangdonga liasü.

New Delhi nung BJP national headquarters nung osangbener senden ka nung jembidang iba party indang national spokesperson aser North-East coordinator Dr Sambit Patra-i ashiba agi, union minister of state Pratima Bhoumik aser Chief Minister Prof Dr Manik Saha na 23-Dhanpur aser 8-Town Bardowali assembly constituency nungi tokteptsü shimtet.

Kasa mapang Union Home Minister Amit Shah-i alliance atema TIPRA Motha den jembia liasü saka iba telok nung tekolakba Pradyot Kishore

Manikya Debarman-i constitutional solution atema akhangba tezüluba nung agütsüba sülen ang alliance ya kumtetsü ta züng-zünga ashi.

BJP yagi tezüluba nung magütsütem nung TIPRA Motha ya kisüng tokteptsü.

BJP indang candidate tenüngtem sangdonger ghonda ishika lir All India Congress Committee (AICC) ajanga Central Election Committee of Congress party nungi temelaba agir assembly constituency 17 atema nübu shima liasü.

AICC ajanga Honibarnü sangdong ka nung ashiba agi, Congress MLA Sudip Roy Barman ya 6-Agartala assembly constituency nungi tokteptsü, taoba mapang MLA inyaka alir Asish Kumar Saha, Diba Chandra Hrangkhwal aser Birajit Sinha nung ya 8-Town Bardowali, 48-Karamcherra

(ST) aser 53-Kailashahar assembly constituency tem nung tokteptsü.

2018 küm assembly elections nung BJP den par allied partner IPFT ajanga menden 44 ngutet aser CPIM-led Left Front-i menden 16 nguteta liasü.

2023 assembly polls atongtsü lia CPIM-i aniba Left Front organization aser Congress party tem "Secular Democratic Forces" kübok tesendaktep yanglu aser Leftist organization yagi assembly constituencies 46 atema candidate sangdonga liasü.

Tripura nung vote agütsütsüpur nisung 28,23822 lir aser item rongnung service viter 10,344 lir, tang mezüngbuba vote agütsütsüpur 65,044 lir, matamabensar (PwDs) 17,297, third genders 77 aser arishi küm 80 nungi tema nisung 38,039 lir.

Assam nung ATM nung auyar züngsem 7 apu

Pathsala, Aenjeti/January 29 (Agencies): Northeast nung tesem balala nung yua aliba ATM nung auyar nisung tenet tashi Bajali police-i Hokulbar aonung apu.

Pua alirtem ya Dulopothar nungi Sahar Ali, Ghograpar nungi Babul Khan, Tamulpur nungi Sukur Ali, Ghograpar nungi Jakir Ali, Tamulpur nungi Juhas Ali, Tamulpur nungi Faizul Haque, aser Ghograpar nungi Manowar Hussain alitsü.

Parnok ya Nalbari aser Barpeta nungi bank tem auyatsü lia apu, ta police-i ashi.

Osang ajanga ashiba agi, Assam kübok tesem balala nung aliba ATM nungi nüburtem indang sen lakh aika auyaba nung parnok dena lir.

Taoba mapang Sahar Ali-i Arunachal Pradesh nung gas cylinder ka amshia bank ka nung auya aser ano telok ka den külemi sen kakh 45 auya.

Assam nung police station

balala nung pua alirtem anema ken o balala benoka liasü.

Patacharkuchi police station indang official in-charge Anup Joyti Patiri-i ashiba agi, pua alirtem yagi Assam, Meghalaya aser Arunachal Pradesh nung auyaba maparen aika nung shilem agia liasü.

"Tang tashinung onoki Pathsala NH-31 nungi nisung tenet pua lir. Aser ano iba telok nungi tantünga züngsemtem aputsü merangba mapang lir," ta pai ashi.

Osangbener dang Authority Letters atema metetdaksür

Dimapur, Aenjeti/January 30 (TYO): Nagaland Legislative Assembly 2023 atema General Election mapang osangbener tem Polling Station aser Counting Center tem telungi ia osang abentsü asoshi Authority Letters agütsütsü.

Anungji osangbener temi Organisation's Identity Card den passport tasazük noksa scan sür iprnagaland@gmail.com mesüra WhatsApp number 8014550661/9862120280 dangi February 2, 2023 tashinung yoktsü metetdaksü.

NSCN/GPRN ajanga asükhu lemsatep

Dimapur, Aenjeti/January 29 (TYO): WTR kübok Tusom yimtsüng nungi Brig.(Retd.) Somi Horam mapang talangka shiranga arur ajungbena January 28, 2023 nü asüba osang angazüka jashir, ta NSCN/GPRN sangdong ka ajanga ashi.

Pa linük tenzüka wadang nung February 1964 nung aden aser pai Naga lima bendanga agütsür tenzüka temaitsü 1980 küm Tatar ka ama shima liasü.

Pa ya linük asoshi teburchi ka liasü aser pai bendanga agütsür meranga linük tenzüka ajanga pa molungsentsü aser yimyatem kuli sayutetogo.

Pa asüba ajanga tawa adokba ya kanga ulua metetsü aser iba tawa süngdaksütsü tasak asütsü.

Pai anibelem mesasai Naga lima tenzüka atema pa tenüng kodanga mamadoktsü aser Naga nung puti otsü nung teti züngshitsü, ta NSCN/GPRN sangdong ajanga ashi.

Tang mangyim-tejashi mapang ka nung mangyimer aser tembarmem den asükhu lemsateper. Tulusang Tsüngremi iba mangyim ajangtettsü tashi agüjang ta sarasademtsür.

Pa asüba ya Naga lima asoshi jabaso ka samaogo, shiba tasünü tashi Naga lima asoshi akang-akang nokdaka liasü. Brig.(Retd.) Somi Horam tanüla teti tatem maka tesunep nung anisüngzükjangma, ta sangdong ajangasa ashi.

BJP lenir tepsetba ken o nung RTI activist ka apu

Imphal, Aenjeti/January 29 (Agencies): Maniour nung BJP lenir ka tepsetba dak sendakba nung Right to Information (RTI) activist ka puogo, ta police-i Deobarnü ashi.

Manipur police temi Honibar aonung arishi küm 53 tain RTI activist aser lawyer Wahengbam Joykumar ya Imphal East district kübok Wangkhei Hijam Leikai nung par kidang nungi apu.

Manipur BJP ex-servicemen cell general secretary (Convenor) Laishram Rameshwar Singh tepsetba indang bushisüngdangba nung shilem ka ama RTI activist ya apu, ta police temi ashi.

BJP lenir ya arishi küm 46 tain Ayekpam Keshorjit-i January 24 anüngdang Thoubal district kübok Kshetri Leikai tesem nung khaset.

W Joykumar ya pa indang Facebook nung BJP lenir tepsetba indang post sütsüba dak sendakba nung apu, ta police-i ashi.

Lendong atalokba anogo nungsa temolung melemi

alisang A Kishorjit ya police matsüngdang prangbong bener arua bendanga agütsü.

Pa den yariteper arishi küm 24 tain Ricky Pointing-a kasa anogo apu.

January 25 nü Chief Judicial Magistrate, Thoubal matsüngdangi anir aruba sülen parnok February 6 tashi judicial custody nung ayutsü telemteba agia liasü.

Manipur DGP nem ashishitep ken o ka benokba nung Ayekpamongbi Laishram Ningol Romila Devi-i ashiba agi la kinungbo Keshorjit ya PMKSY beneficiaries shimba indang asüngdangyatsü atema Thoubal semdangba mapang L Rameshwar den tepang agi raratepa liasü.

Rameshwar ya taoba mapang PMKSY indang Nodal Officer kati taa agütsür yua liasü.

Tena tsüngta kanga mejungi raratepa aodang Rameshwar-i pa indang prangbong sayu aser pa dak akhatsü amokmeren.

La kinungbo ya RTI activist ka liasü aser pai L Rameshwar dak pa kumzüktsü mechi akha, ta lai ashi.



Shokhuvi, Nagaland nung January 28, 2023 nü Assam Rifles Centre & School nungi passing out alidang tetsür aser tebur 196 tsüngkang medema jajaba noksa nung angur. Hopta 44 tashi military training agiba tembanga iba sentong ya agia liasü.

India linük dang nangzükba ataloktsüogo: Rahul Gandhi

SP executive council-i Shivpal Yadav party general secretary shim



January 29, 2023 nü Srinagar nung Congress Party-i 'Bharat Jodo Yatra' nung shilem agidang tangokba noksa nung angur.



Lucknow, Aenjeti/January 29 (Agencies): Amongnü Samajwadi Party (SP)-i national executive senden nung Akhilesh Yadav Tir aser teko, Shivpal Yadav, general secretary shimba osang sangdong ka ajanga metetdaksü.

Akhilesh Yadav aser teko, Shivpal Yadav na 2016 küm pila saka SP tentetsang, Mulayam Singh Yadav yaküm December ita nung süadokba sülen Mainpuri Lok Sabha by election mapang nung tena tanaben longjema liasü. Amongnü SP-i züngsem 62

aliba national executive sangdonga liasü.

Shivpal Yadav ya SP national general secretaries 14 rongnung ka asütsü; tanünga general secretaries rongnung Mohammad Azam Khan, Swami Prasad Maurya, Verma Ravi Prakash aser Balram Yadav nunger densema lir.

Akhilesh Yadav maneni party tir asütsü, Kiranmoy Nanda tatong tir asütsü aser Ram Gopal Yadav-a maneni national principal general secretary asütsü.

Sudip Ranjan Sen party treasurer asütsü.

Srinagar, Aenjeti/January 29 (Agencies):

Amongnü Srinagar yimti tiyong nung aliba Lal Chowk nung Congress Party lenir, Rahul Gandhi-i linük wako salatsüba sülen pai, India dang nangzükba tanü ataloktsüogo, ta metetdaksü.

Yaküm Tamil Nadu kübok Kanyakumari nung 'Bharat Jodo Yatra' tenzükba sülen Hombarnü Srinagar nung yatra sentong tembangtsü.

Lal Chowk nung minute 10 shi sentong agiba mapang nung kilometer ka telongtet nung security kanga akanga liasü. Honibar aonung nungi tenzükba Lak Chowk-i aoba gari lenmang ajak mokdanga gari ka danga mesenzüdaksü.

Rahul Gandhi den teno aser Congress general secretary Priyanka Gandhi Vadra, party lenirtem aser party nung inyakertemi Amongnü anepdang 10:45 ako nungi Srinagar kübok Pantha Chowk nung yatra tenzükba liasü aser parnoki Sonwar tsütsüleni

kilometer 8 shi jaja. Sonwar atongba sülen Rahul, Priyanka aser party lenirtem Srinagar nung aliba party headquarters tashi gari nung aoba sülen parnok Lal Chowk-i oa Rahul-i linük wako salatsü.

Tesülen Rahul-i twitter ajanga, "Lal Chowk nung linük wako asongba ajanga India dang nangzükba tanü ataloktsüogo. Tesempai tamakok angutsü, temeimi teti takok angutsü. India nung teimla tasen tenzüktsü," ta metetdaksü.

Bharat Jodo Yatra ya yaküm September 7 nü Kanyakumari nung tenzükba sülen state 12 den Union Territories ana ayimjema kilometer 4,000 jungnüa jajaogo aser Hombarnü tatamsa Srinagar nung aliba Congress office nung linük wako songa iba yatra sentong tembangtsü.

Hombarnü SK Stadium nung lokti senden tuluka agitsü aser iba senden nung adentsü atema Congress-i opposition party 23

jaokogo. Amongnü anepdang All India Congress Committee general secretary, in-charge communications, Jairam Ramesh-i Twitter ajanga, Lal Chowk nung linük wako salaba sentong Hombarnü agitsü liasü saka anogo ka jelia salatsüsa akümer," ta metetdakja liasü.

'Bharat Jodo Yatra' kübok Rahul Gandhi leniba nung mapang balala nung Congress lenirtemi Tamil Nadu, Kerala, Karnataka, Telangana, Andhra Pradesh, Maharashtra, Madhya Pradesh, Rajasthan, Haryana, Delhi, Uttar Pradesh, Punjab, Himachal Pradesh aser Jammu & Kashmir ayimjema tetsüng agi jajaogo.

Security tashi maitba ajanga Hokolbarnü Anantnag district nung yatra thina liasü.

Administration-i ashiba agi, lokti imlaba dang nungi tuluba adenshiba ajanga security agi mayimjemsüsa aküm, ibayongji Congress-i security jagi melung mesüi liasü.

Odisha nung police kati Health Minister Das dak injang khaloktsü



Odisha Health & Family Welfare Minister, Naba Kishore Das injang agi yiruli tangokba noksa nung angur.

Bhubaneswar, January 29 (Agencies):

Amongnü Jharsuguda district nung assistant sub-inspector of police kati Odisha Health & Family Welfare Minister, Naba Kishore Das dak injang khaloktsüba sülen pa yirua hospital-i anir ao.

Minister Das dak injang khaloktsüsangji Assistant Sub-inspector of Police (ASI) Gopal Das lir, ta jangaogo, ta police ketdangser kati metetdaksü.

Jharsuguda district kübok Brajrajnagar jila nung senden ka nung adentsü atema aoba mapang nung police ketdangser jagi Biju Janata Dal (BJD) lenir, Naba Kishore Das dak injang khaloktsü.

Osangbenertem den jembidang Brajrajnagar Deputy superintendent of police, Gupteswar Bhoi-i, "Assistant Sub-inspector of Police (ASI), Gopal Das-i minister dak injang khaloktsü. Minister injang agi yirua

hospital-i anir ogo," ta metetdaksü.

"Onoki injang khaloktsüba kuliji jangjatsü merangdar. ASI, Das nem temerenshi tulu agütsütsü," ta police ketdangserisa metetdaksü.

ASI, Das-i pa indang pistol amshia Minister Das dak injang khaloktsü.

Iba osang angashia Odisha Chief Minister, Naveen Patnaik-i Health Minister, Naba Kishore Das khasettsü merangba tatalokba aitsüogo.

"Minister Naba Das anema inyakba osang angashia ni kanga aoksar. Ni iba tatalokba sashia aitsür aser tekaraba nung pa taneptsü angutsü atema sarasademtsür," ta CM-i metetdaksü.

"Iba tatalokba bushisüngdangtsü atema Crime branch nem tetuyuba agütsüogo aser crime branch nung tongti ketdangsertem dang iba tesem jagi oa kuli bushitsü tuyuogo," ta Patnaik-isa metetdaksü.

VACANCY ANNOUNCEMENT

NUWAKOT GLORY SECONDARY ENGLISH BOARDING SCHOOL

Suryagadhi -5 Phedibeshi Nuwakot , Nepal

We are looking for

Talented, hardworking, qualified, energetic teachers for our glorious institution in secondary level.

Basic job information : - Job category : Full time Teacher
 - Level : Secondary
 - No of vacancy/s : 3

Maths teacher - 1	English teacher - 1	Account teacher-1
-------------------	---------------------	-------------------

Qualification : Minimum Bachelor (as major subject)

Job location : Suryagadhi - 5 phedibeshi Nuwakot, Nepal

- Offered salary : Rs.18,750/- with free Food & Lodging (Extra class extra pay)

- Apply Immediately

- Job experience required : Minimum 2 years teaching experience.

For Contact : Mobile 9841512236 Viber / WhatsApp
Email : adhikaripuru4@gmail.com



New Delhi, January 29, 2023: Rashtrapati Bhavan kima 'Amrit Udyan' nung 'White Stock' ta ajaba naro punga aliba noksa nung angur. Rashtrapati Bhavan kima naro tapu balala aika ponga lir.



TIR YIMYIM YIMOBILEM (EDITORIAL)

DIMAPUR TENTONÜ, AENJETI (JANUARY) 30, 2022

Naga nunger apu ka renemogo

Tanga state nung asünungbo ola madoki manger sangwa nung state government-i nübortem asoshi renemtsür alitsüba mapa ka, Nagaland nung asüba agi nübortem longkak aita kangjen akangba ajanga küm terbuba nung Nagaland Foothill Road ta ajaba lenmang nung Doyang apu renemetoggo. Atangji, menur süaka renemetba asoshi pelar saka nübortemi anung marem apu ya renema sayatsü dang ashi, ano iba lenmang nung garibo mejajatetsü, kechiyong ano lenmangbo merenemi lir. Yimkong jajatsüba gari lenmang tulu asünungji lenmangbo government-i yanglu, ajisüaka iba apu renemetba asoshi kar nem danga tenüngsang agütsütsüsa lira, iba tenüngsangjibo ajunga Nagaland Foothill Road Co-Ordination Committee (NFHRCC) nem agütsütsüla. Tang menur asüyonga, Doyang apu renemetba ya küm ter jakdang Ao Senden akhüm nung Ao Senso Telongjem Dimapur-i anir iba lenmang nung anogo shia jajatsü pur Naga kintem longjemer kena manen state government nung alirtem arakzüdakja inyakba ajanga lir. Nübortem tashiji iba apu yanglutetba mapa nung tuluka sayutetoggo. Iba takok asoshi NFHRCC nung tayonger Wb.Supu Jamiri anir züngsem ajaki kanga meranga inyakoggo. Apu renemer awashi ka mesayu, state government-i NFHRCC purtem danga mashi online nung dang kilo kilonser Amit Shah peladakja semzüdaktsü dang ashi, shitakba nungbo apu tenünga NFHRCC Bridge ta janütsüka, Naga nunger yimkong asoshi parnokü küm ter nüngsen aser tebelem arema bendanga agüja inyakoggo. Iba apu ajang shia parnok mapa tajung nübortemi bilemtetsü. Naga nunger asoshi gari lenmang tongtibangtiba lenmangji Foothill road ta ajaba tenemtsüng lenmang ya lir. Iba lenmang yagi Mon district nungi Assam majangi Longleng, Mokokchung aser Wokha district ajanga Dimapur atongtsü, anungji akhidang Assam mokdangba agi asenok mejajatet takoksa aser timtem ajuruba anogotem to, kodang iba tenemtsüng lenmang nung gari jajatsü tenzükdir, akhi otsüang ka akümtsü. Aji oda, kodang tenemtsüng lenmang nung asenok jajatsü tenzükdir, asenok asoshi Amguri, Mariani, Jorhat, Titabar, Golaghat aser Silonijan ajanga jajatsü nungdak madoktsü, anungji item tesemtem nung asenok süngo jemdak aser chiyongdak tesemto shibangtsüsa akümtsü aser gari totzü enokdaka ajema akümtsü. Item shishilembaba mapatem ajakji asenok Naga nungertemi tenemtsüng lenmang sema lapokyonga aotsü. Aji dang masü saka tangbo süng long aser osettsüset ajak khu abenba gari nung Assam majangi Dimapur railway station tongtettsü. Asenoki asen mangdang nung merajemer aser mengujemer dang ashi, Assam majang ser Mon, Longleng, Mokokchung, Zunheboto, Tuensang, Kiphire, Noklak aser Wokha district-tem nungi Dimapur atongtsüba nungji asenok asoshi tajangzük aser anisüngzük tulu lir. Shitakba agibo, iba lenmang yabo Nagaland state nguli yanglutsüba lenmang liasü, ajisüaka state government nung alirtem mazüngba agi meyanglutet südi. Aji oda, nübortem asoshi tajangzük tulu aliyong, lenmangji asangsang nung yakta lapokdaktsünüa lokti, arogo aser kija kibong aikati senotsü tenla agüja yariba angashiogo. Item ronngnung ABAM den aliba arogotemia temulunger tenla sarutepa sen lakh 36 dak tali bener oa state government nem agütsüba asenoki metetoggo. Atangji, iba senji Chief ministeri tagizükbo agizük saka ABAM nemsä meyipa agütsü südi. Ajisüaka, iba jagi nübortemi tenemtsüng lenmang yaktasa renema inyakdaktsünüba tejangraba ka sayuogo. Tanga iba tangatetba aser tejangrabaji nübortem mulungjang nung mesamadaktsüi, iba tenemtsüng lenmang ya 2-lane kuma black topping ser gari mejaja tashi nübortemi state government nung alirtem anisüngzük meyutsüi rongshitsüla. Tanga state nungbo nübortem asoshi government nung alirtemi nungdak reprangteta inyaktür, saka asen state nungbo asenoki asenok nungdak reprangteta longkak aita meinyakdaktsüra, asenok yimkong lenmang agi arem akümtsü, school aser mozü kidang nashi ak mejangtsü aser Nagaland ya kibur maliba jen ama ka kumadoktsü. Iba amaji ka mekümdaktsünüra, asenok senso shia pei alidak wainshin meteta government sentong, maparen aser senso temeten aser tashi metetba senso kaka kuma litetsüla.

OLEMSABANG

NAGALAND KHRISTA ASOSHI VS INDIA HINDU ASOSHI,
KHRISTAN YIMSÜ ASER RELIGIO-POLITICAL TAYONGZÜKBA

~ K.Temjen Jamir, Yimozülur, Tir Yimyim.

(Yashi adok nungi...)

Atangji, Efesa tapu nung ashi ama, asenok Khristan-tem tongpang yabo shi aser azü den melangtepba tongpang ka masü saka Tsüngrem anema süngyanglu külemba yimsü, nisungtem dang mememi teti teküpbok jenjang nung lidaktsüba sobaliba tamajung, ochimashi, shi azü mazüoki mashimashi aliba taküm yimya, temeim mesayutetba aser tamajung inyakba tanülatem anema raraba tanüla tongpang lir. Item tamajung tanüla talenba kübok alirtem dang Yisu temeim otsü shia salatsütsüba mapamela masü. Ibaji nisung tashi agibo makoktsü. Iba jagiang Yisui asenok nem item tongpang nung raratsü asoshi ain aser tashi agüja lir (Mathi 28:18). Iba ain aser tashiji amshia asenoki mamangba purtem dang Yisu temeim osang tajung shia temulung meyipdaktsütsüba Hindutva den tokteper Khristan-tem teinyaktsü khuret lir.

Aiben asenoki Yisu Khrista osang tajung yimsü sangdongba yimya aser inyakyim ya takar aser tulurtemi sensaker aser tilartem alidak bushia oagi mesüzükba mapa ka amato bilemetsüsa inyaker. Aiben asenoki yimti nung oagi lokti sentong tulu ayongzük osang tajungji ashitsü meranger. Ano, khenkhenbo Yisu Khrista osang tajungji masü saka par sobaliba abensüoshi, chiajem aser benjongbentsü yimyatem kenyongi tasen kuma melenshitsütsü atema ao aser aru ama bilemetsüsa asenoki inyaker. Ano, asenoki Hindu nungertem dang Tsüngrem temeim osang tajung ashitsü atema ali kimong tama bushir aser kiojen tama yanglur. Iba jagi aiben tesem aika nung asenoki osang tajung indangji nübortem dang meshitet tamakok angur.

Mamangertem alidak osang tajung ashitsüba ya Laishibai teyuba inyakyimji nisung alidaki orr parnok ajurua kuli asütsüba lir. Ajisüaka, asenoki bushia oagi ajurutsüba nisungtem sobalibaji tama metet nungang, asenoki parnok denji melamelaa tembar yimtettsü aser tembar yimtet nung dang asenoki parnok dang osangtajung indangji shitetsü. India nung ya Hindu nunger kin kidong (jati) ya tapu meyirijang asem shi lir ta ashir aser item kin kidong shiaji sobaliba aser achi ajem yimya balala, Hindu nungersa asüyonga karibo shi achir aser karibo machir. Item kin shiaji tekülem yimya balala kechiyong tsüngrema balala. Hindu nungertemi parnok tsüngrem külemba ya lendong timtem aser teraksatsüba nungi kumzüktsü asoshi tetsübu agi külemer, kechiyong parnok tsüngremtem yabo teraksatsüba tsüngremtem lir saka asenok Khristan-tem Tsüngrembo temeim Tsüngrem lir, Paibo raksatsür masü kumzükter. Iba Tsüngrem tsüngdang asenokbo tashimait agi sünga lir saka Hindu yimsü dak amangertemi parnok tanülajiang tsüngrem ama bilemer. Aji oda, asenoki Hindu nungertem dang Yisuji Tsüngrem chir ta ashibaji parnok asoshi kecha balaka masütsüa akok, kechiyong parnokia parnok külemba tsüngrem Ganesh-a Shiva-er jabaso nung koda ta bilemetsü. Iba amaji Hindu nunger tamangba yimsü nung tsüngrem chir aika lir. Itemji metetsü atema asenok Khristan-temi parnok den tembar tajung kuma asenoki dang mejembii parnok nema jembidaktsütsüba kanga tongtibang asütsü.

Asenoki aiben Hindi ken tena tsüngsanga pelatepba ya Tsüngremi memulungba mapa ama bilemer, mesüra tsümartürtemi tenütsü nung tikha atepba ya temenen mapa amai bilemer, mesüra tsümar kongki amshia ken atenbaji Khristan yimsü dak mapet amai bilemer. Ibayongji, asenoki mamangertem Yisu dangi anir marutetter. Ajisüaka, kodang asenoki Yisu Khristai agütsüba osang tajung ya par sobaliba den peta sayutetdir, idangjiang Yisu temeim osang tajung agi RSS aser BJP lenirtem ki aser mulungjang atongtsü. Yisu temeim agi mamangertem kumzüktsü atema asenok osang tajung abenertemji, Paul-i 1 Korint 9:12-13 nung ashi ama, osang tajung agi nisungtem kumzüktsü asoshi parnok amaji kumtetba nisung asütsü nungdaker. Aji oda, asenoki osang tajung ashitsüba purtemji sensaker süra asena sensaker ama, parnokji takar tular süra asenoka parnok agizüktsüsa aser parnokji shi machir kin süra asenoka shi machir akümtsü, parnok teka o teka na amtepa mesalemba kin süra mesalemetsü, kidangi tsüngsem semer matuba kin süra asenokia yamaji bentshitsüla. India nung Khristan yimsü ya Tsüngrem temeim osang tajung masü saka bendangertemi bener aruba tamangba yimsü tasen ka amato aikati bilemer, kechiyong asenoki asen sobalibatema ajak temenen amato bilema endok aser tangar sobalibatema yamaji Khristan yimsü den mapet ama bilemdaktsür. Hindu nunger tekülem kidang amentsü menden maka aser parnokbo teloka mesenteper saka kija kija sarasademi dang anepdang nikongtsütsü shia aotsü, anungji parnok asoshi asenok ki ka nung sentepa menden nung ayongayonga mener Tsüngrem külembaji kenyongi lisopurtem dak mapetba yimsü tasen bener aru amai bilemer. Itemji meteta kodang asenoki mamangba purtem den osangtajung indang jembidir, Tsüngrem tanüla parnok mulungjang nung mapa inyaktü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir

PBCC Youth Mungdang aser Music Fest repsema agiogo



January 28, 2023 nü Nerhema Baptist Church, Kohima nung Pesocha Baptist Church Council (PBCC) Youth Convention den Music Fest repsema agidang tangokba noksa nung angur.

Kohima, January 28 (TYO): Honibarnü Nerhema Baptist Church, Kohima nung Pesocha Baptist Church Council (PBCC) lanurtem 44buba mungdang den külemi Music fest repsema agiogo; iba sentong ya "Nenok Kü kulitem" (Isaia 43:10) nung ajemdaker agi.

Anepdang tekülem sentong nung o jembir managing director, G Rio School, Kohima Khrienuo Moa-i meimchirtemi Tsüngrem sentsüwangshi metongtetyonga Tsüngrem taochi agi Yisu Khrista Kangki nung angenlokba ajanga meimchir menen alangzük, ta ashi.

Laisa, Paul ya Yisu reshikangshir ka liasü saka pai Kibuba agizükba sülenbo pai pa 'menenpurtem rongnung tamajungtiba' ta ashi aser pa taküm melenshi, ta ashi.

Iba dak sendakba nung lai lokti dang, pei taküm nung

Tsüngrem taochi aser temoatsütem züngdangang aser Khrista atema taküm lia tenyaba wadang inyaksüla, ayongzük.

"Asenoki khuret bena alu wadang nung nokdaker Khrista osangtajung melemsatepra asenok ang 'Mission lu' kümdaktsür. Tsüngremi melungbaji meimchirtem nem Pa taochi aser tekümtet agidaktsüner," ta laisa metetdaktsü.

Laisa lanurtem dang pei tamang jenjang akanga tashi itta alitsü aser Tsüngrem tenzüksü atema arrshi küm telatet kecha meliaka lanur asüba mapang nung Tsüngrem tajungtiba agi tenzüksü ayongzük.

Iba sentong ya Ruokuosienuo Suohu leniba nung agi, Koinonia Baptist Church nungi lanurtemi choral ken ka aten, Teichüma BKK aser Tsiemekhu Basa BKK

nungia lanurtemi ken aten aser Thepfuchatuo Mere o Mercy Thepa nati Lai zünga liasü.

Nikongdang sentong nung tongti o jembirji Pesocha Baptist Church Council nung youth director, Mengusielie Kesiye liasü.

Pai lanurtem dang alima atema tesangwa kaka asütsü aser iba atemaji tanela nung süngjang tangdaktsütsü ayongzük.

Paisa lanurtem dang pei taküm tanaben Khrista nem bendanga agüja tashi angatsü, Tsüngrem tsübuttsü aser Khrista mesüka alitsü ayongzük.

Iba sentong ya Keneingulie Rüpreo leniba nung agi, Khedi Baptist Church-i choral ken ka aten, Nerhe Phezha BKK aser Viphoma BKK nungia lanurtemi ken aten aser Viphrezo Theünuo o Rüddivinuo Kense nati Lai zünga liasü.

Onoki nisungtem Khristan yimsü dangi memeyipdaktsür: John Barla



January 28, 2023: India nung Union Minister of State for Minority Affairs, John Barla-i, onok Khristantemi linük nung nisungtem Khristan yimsü dangi memeyipdaktsür, ajisüaka India tejakleni aotsüsa Khristantemi tongti shilem agiogo, ta metetdaktsü.

India kübok state aika nung Arogo lenirtem aser Khristantemi tangartem Khristan yimsü dangi memeyipdaktsür, ta tai tongloksüba mapang ka nung Union Minister, Barla-i, "Nunga, onoki nisungtem yimsü memeyipdaktsür," ta ashi.

Hokolbarnü Kolkata nung peace rally ka nung jembidang

minister-i linük nung aliba hospital tem, nursing homes, schools aser college aika nung Khristantemi nüburttem tenzükba ajanga linük yangerba nung shilem agiba metetdaktsü.

Paisa, sorkari lapokba reju maliba linük tesem tezülen-a Khristantemi schools lapoka lir, ta ashi.

Khristantemi yamaji inyakyonga aikati Khristantem mesakloker mesüra Khristantem akhümmetsübur, ta pai ashi.

Chhattisgarh nung atalokba ama Khristantem bendanga mezüngshitsüla, ta shia Barla-i, "Onoki yimjung dak alaka kecha maginer. Longjemtsü atema

mapang tongogo," ta ashi.

"Ni minister akümba mapang nungi, minority minister ka ama aser Khristan ka ama- "Linük nüchiso mangudang aser nüchiso anguba sülen-a linük atema onokia (Khristan) kechi shilem agi? Onoki kechi agütsü aser iba melenji onoki kechi meyipa angur? ta ni shisadanga liasü," ta Barla-i metetdaktsü.

"Khristantemi sorkar anema menokdaker. Shishilembartem aser yimtenren lenirtemi par chirnurtem Khristan school temi yoker. Süra kechiba onok dak azüker? Yimsü meyipdaktsüba atema kechiba Khristantem nem tai tongloksütsü?" ta pai asüngdang.

"Aibelenji, onoki linük atema inyakba onoki mesangdonger. Ibaji ajanga sorkari onok akhüm metsübur," ta Barla-i ashi.

"Khristantemi linük yangertsü atema inyakba mapa balala sangdongtsü atema linük tesem ajaklen item ama sentongtem (peace rally) ayongzüka agütsü. Iba ya yimtenren onük ka masü. Khristantemi yimjung aser terenlok dang aginer," ta paisa shisem.

ANOGO ABEN TSÜNGREM DEN

Teti adenba

"Ajiang, alima matem tashi ni nenok den teti dena lir."

Kibuba shia aruba aser kotaki atuba tetsüngda anogo lir tashi liasü. "Kuli jenti agi peisasa parnok dang taküm sayu" - T.M.:1:3. Item anogo lir nütsüngtem den alidang Kibubai tesem ka nung dang nütsüng ali masü, yimya aser mapang balala nung parnok den ajurutepa jembiba liasü. Parnok dangi aoksa adoker Pai parnok jembiba ajak angashiba shia liasü. Pa tenük menguaka Thomai jembiba Pai angashiba ashi. Item anogo lir tatem nung Pai tenangzükba tejangja agütsü, "Ajiang, alima matem tashi ni nenok den teti dena lir."

Item mezüng nütsüngtemi parnok tenüki Kibuba menguaka Pa parnok den dena lir ta tangazükba tulu angazük; kasa lessonji nai aser ni angazüker asü masü? Kibuba shia aruba ajanga item tashi mait aser tasü mait nütsüngtem tasü tait aser tashi tait melenshi ta asenoki aiben angashia arur. Saka aji ochiji ibaji dang masü. Parnok tepela, mainshi aliba, Khristai kümzükba ain metsübui kuliji mapa pungu ka nung dang adokdaktsüba liasü; mezüngbuba, Pa atangji shia aru; tanabuba, Pai kotak chuba menden nung ajak azüoker; tesembuba, Pa tenük agi mengui parnok den ajaklen alir; pezübuba, Pa tamaren yimli nung tanaben adoktsü; pungububa, Kibuba marudang parnok temang asütsü aser Kibuba den kidang alitsü.

Anogo lir alidang parnoki ochi angazükbaji tenük agi mengui Kibuba parnok den teti dena lir ta angazük. Pa temang tenük agi ngua aliba dang nungi tenüki mengui parnok den dena alibaji tali sentiba ta parnoki angazük. Pa tang parnok den tenük agi mengui dena lir- Tanela Temeshi ajanga parnok Pa dak lidaktsür ! Yamaji tanüa asen Kibuba Yisu asenok den dena lir. Pa adenbaji akhüm ka ama masü, shidakba lir. Ibai tejembiba ka dang masü, mesüra jangratemtsü o ka dang masü. Ibai teti taküm aliba Kibuba chichiba nung asenok den adenba lir.

Pa adenba tetezü, Pa asoshi kuli asüdang timatemdang ajaklen Pa dena aliba lir. Saka iba ama tenangzükba liaka aikati temulung makai akümer aser temulung masür. Koda taochitsü lir ! Kodang Pa adenba metetta melilir, asenok melamelaa temulung makai kümdaktsür, ratamatar, atasaa meliteter aser tai telemtetba agir; saka kodang Pa adenba metetta pelaa lidir, temulung makai akümdang tajung inyaksü bilemer, rishikangshi mapang taremsük alir, lendong mapang tasü itdaktsür, telemsatep adokdang süngjema alir, terongjen mapang nung pelaa alir. Lisem limaji kolap naro ama akümer, aser ali tapungji atsüki ka akümer. Khristantem, item otem ken shisadangang: "Ajiang, Ni nenok den tatem tashi dena alitsü...!"

Dolly Parton-i osangtajung ken ka sayaogo

January 29, 2023: Tawa dream about God/ He was country kentener nüngtugu, Dolly Parton-i osangtrajung ken tasen ka sayaogo, aser lai ashiba agi, Tsüngremi mangdang ka ajanga la nem iba kenji agütsü.

La arrshi küm 77 ajungba anogomong (January 19, 2023) nung ken tasenji sayaogo.

January 19 nü lai Instagram ajanga, "Mangdang nung Tsüngremi kü nem iba ken agütsüba sülen ni saaka ken zülu tenzük aser hopta, ita ishika nung iba ken renem," ta metetdaktsü.

"Ni iba ken dak sendakba maparen ajak renemba sülen kü tasoba anogo nung sayatsü lemteta liasü. Nenoki iba ken jangratema angatsü imlar," ta lai metetdaktsü.

"Don't Make Me Have to Come Down There," ken dak sendakba nung Dolly Parton-i, "Iba ken ya kü mangdang nung anguba ken lir," ta ashi.

English oshi nung kenjangji yamai lir, ""Last night I had a

standing on a mountain top/ Looking down, around in such dismay. And in my dream, I heard Him say/Don't make me have to come down there/My children, you had best beware/ If you don't pay attention, consequences will be dire/ Don't make me have to come down there."

Tesüiba küm aika tsüngda Dolly Parton-i awards aika nguogo aser item rongnung 1999 küm 'Country Music Hall of Fame' nung züngokba densema lir.

2021 küm People magazine's "People of the Year" nunga la züngoka liasü, aser iba dak sendakba nung lai, nisungtemi Tsüngrem dang nungibo celebrities taliba külemba ya tesasatsüka, lir, ta ashi.

Dolly Parton-i aiben la Khristan tamang indang yimjak nung lemsatepa arur. La tebou- a Pentecostal sayutsünger ka liasü.

AO OSHI ANGAZÜKDAK:
TANÜ ANGAZÜKTSÜBA OJANG



Oruru

(v) tebur washiba ola, tayongzükba ola (male call , yodel)
* Tsüingsanger teloki **oruru** tulu agüja aru.

Orülem

(n) o shitak jembitsü aser zülutsü lenrü sayuba (grammar)
* Oshi ajak nung **orülem** amshitsüba ya kanga tongtibang.

OLONG PAITEP # 6413

1		2		3		4		5
			6		7			
8								
					9			
		10						
11								12
				13		14		
15								
16						17		

TIPIEN

- 1. Nüji masü - (4)
- 3. Techinütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasademdang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 6412 TELANGZÜBA

TIPIEN :

- 1. Tajang, 5. Berem, 6. üng, 7.Nati,
- 9. Asü, 10. Tamagitsü, 12. Sak,
- 14.Joko, 15. Nga, 16. Anüng,
- 17. Tzürem.

LANGTSÜNGLEN :

- 1. Takar, 2. Jongdak, 3. Teki,
- 4. Lemtsü, 8. Tai, 9. Asangur,
- 10. Talang, 11. Aso, 13. Taküm,
- 14. Jung.



DR. ALOKBAR CLINIC NUNG :



Patient : Doctorba, ni kü teka tabelen ya yamaji mekanga atudangsa kanga angor ajaa.

Dr.Alokba :Tebenji mekanga matudangbo mangor südito?

Patient :Hau mangora, sir.

Dr.Alokba :Waa, na matu ati, mekanga atudang angor süra kodanga mekanga tetu koto ajil!

~ Lilir : WhatsApp

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

AR aser Arunachal police-i NSCN-K (YA) züingsem 2 apu



Itanagar, January 29, 2023 (Agencies): Assam Rifles aser Arunachal Pradesh police yaritepa National Socialist Council of Nagaland, NSCN-K (YA) züingsem ana puogo.

Changlang district nung tena apu aser tena ket nungi prangpong-injang aika ngutetogo.

Changlang district kübok Old Longchong tesem nung Chinese-made 7.62 mm rifle 1, AK magazines 2, AK-47 rifle ammunition 490 rounds, pistol ka den magazine, pistol

ammunition 2 rounds, 10-12 meters' safety fuse, radio set 1, mobile phones 2 aser battery 2 angu.

"Khamkai aser Namgoi tesem nung NSCN-K (YA) telungpurtem senzüba osang tejangja angazükba sülen 19th Assam Rifles aser Arunachal Pradesh police külem telok kati January 28 aonung mita ao" ta Changlang district nung Superintendent of Police Mihin Gambo-i ashi.

"Iba mapang parnoki NSCN-K(YA) züingsem ana apu aser tenaji Nayan Kumar

Chakma aser Gangwang Wanglee na ta jangjaogo" ta Gambo-isa ashi.

Nayan Kumar Chakma-i ashiba nung ajemdaker bushitepa aodang Rima Putak circle kübok Old Longchong nung arem nung prangpong-injang aika ngutet, ta paisa metetdaksü.

Külen, January 26 nü NSCN-K(YA) züingsem kati Changlang district police, Assam Rifles aser CRPF tsüingdang temai adokogo. Iba nisung ya Kamtim Rekhung ta jangjaogo.

Congress-i Meghalaya Assembly election atema candidate ajak metetdaksü

Shillong, January 29, 2023 (Agencies): Congress-i Meghalaya Assembly elections atema tatembangba candidates tarensen metetdaksüogo.

"Central election committee (CEC) ajanga tatembangba candidate pungu mulunga agizükogo" ta Meghalaya Pradesh Congress Committee President aser MP Vincent H Pala-i ashi.

Candidate punguji- Jhanika Siangshai (Khliehriat), Arbiangkam Khar Sohmat (Amlarem), Chireng Peter R Marak (Kharkutta), Dr Tweel K Marak (Resubelpara) aser

Carla R Sangma (Rajabala) nung lir, ta paisa ashi.

January 25 nü Congress-i candidate 55 indang tenüing metetdakja liasü.

Mezüngbuba tenüing sayaba nung Pala dena lir aser pai East Jaintia Hills district kübok Sutnga-Saipung constituency nungi tokteptsü.

Meghalaya Assembly Election ya February 27 nü agitsü aser February 7 tashi nung nominations asütsü. Maneni, March 2, 2023 nü votes azüingtsü.

Congress-i rally tulu mesüra star campaigners mayongtsü saka voters den sendakteptsü

atema dang temulung agütsütsü, ta Vincent H Pala-isa ashi.

Ozü candidate tem rongnung parnok 80% tashi tejak tasentem lir. Onoki kilen shia semdanga senzütsü aser local community level nung dang rally tilala agitsü, ta paisa ashi.

"Onok indang star campaigners malitsü aser political rally tulutem mayongtsü. Ajisüaka onoki Meghalaya state nung kechi tajungba iba nung temulung agütsütsü. Yangi nisungtemi party masü saka candidate tem ang tejangjaba metetnür" ta Pala-isa ashi.

Tipra Motha chairman Pradyot-i election nung metokteptsü

Agartala, January 29, 2023 (Agencies): Tipra Motha chairman aser chuba jabaso Pradyot Kishore Manikya Debbarma-i February 16 nü assembly election nung metokteptsü ta shiogo.

Tripura nung local news channel kati Pradyot teyi tantsüla Pragma Debbarma indang tenüing amshia taila

osang ka prokshiba atema pai aitsüogo.

"Kok pin aser tanga channel kari Takarjala nungi keyi tokteptsü ta osang prokshiba atema jashir. Tanga political kibongtem ama mesüi Tipra Motha atema ozü kibong nungi shingaia metokteptsü" ta Pradyot-i ashi.

"Ozü party-i chuba kibong nungi masü saka yimtsüingtem nungi nokinketeritem nem menden agütsütsü" ta Pradyot-isa ashi.

January 28 nü Tipra Motha-i candidate tem indang mezüngbuba tarensen metetdaksüogo. Parnoki menden 20 atema candidate tem shimogo.

PREPAK-i January 25 bomb pokdaksüba atema tenüing agir

Imphal, January 29, 2023 (Agencies): Manipur kübok tesem asem nung bomb pokdaksüdang lisopur tetsür ka dena civilian 6 yiruba tatalokba atema People's Revolutionary Party of Kangleipak (PREPAK)-i tenüing agiogo.

"Indian Republic Day anema noktaka onoki tesem pungu nung bomb yutsü aser Ukhrul bazaar, Wangkhei bazaar o Iron bridge nung pokdaksü" ta Publicity Officer, Department of Publicity and Propaganda,

(PREPAK) Mangal Khuman-i ashi.

Ukhrul bazaar nung R-day amongtsü anogo ka jakdang bomb apokdang tetsür ka dena nisung 4 yiru.

Prepak-isa civilian tem yirutsüba atema sasaa bilemba aser parnok tekaratiba nung tajungba akümtsü metetdaksüogo.

January 25 nikonngdang Ukhrul bazaar nung bomb apokbaji timer setting meshitakba ajanga liasü aser iba

jagi nisung pezü yiru, ta parnokisa ashi.

Manipur Legislative assembly nung taoba Deputy Speaker aser BJP Manipur Pradesh spokesperson MK Preshow Shimray-i Ukhrul district nungi tetsür ka yiruba semdangogo.

Tangkhu Naga Long dena telok aikati iba tatalokba aitsüogo aser telungpurtem dang nisung longsoa adenshidak bomb mepokdaksütsü atema mepishia metetdaksü.

Pakistan nung bus aser rong lendong nung nisung jenti asü



Islamabad, Aenjeti/January 29 (Agencies): Pakistan nung transport lendong ana atalokba nung nisung 51 asü.

Deobarnü bus ka apu ka nungi tsüka nisung 41 asü aser ano Khyber Pakhtunkhwa province nung rong ka mükepoka yangjia tanur ter asü. Balochistan province kübok tesem tezü kalen bus ya kangla tarok ka nung tsüka liasü. Lasbela district kübok Bela yimti tezülen iba lendong atalokba tesem nung senior administration official Hamza Anjum-i ashiba agi, tasü mang ya majiteter.

Bus traksa nungi nisung tasü mang 40 den yirur alir nisung asem agitet aser ka mapang tatsüka tsungta asü, ta Anjum-i ashi.

Takum kumzüka aliba nisung ana ya kanga sashia yirur lir.

Ketdangsür temi ashiba agi, bus ya Balochistan yimtiba Quetta nungi linük south tsütsü Karachi yimti bushia aor liasü. "Bus anisang ya amoa ao südi ta bilemer. Meta talang jajaba mapang pai gari ya kanga kera ania liasü südi," ta Anjum-i ashi.

Edhi Foundation aid and emergency response organisation ajanga video lemsatepba nung nisung aika adenshia bus teraksa mükepsaa bushia liasü aser ambulance nung inyaker temi nisung tasü mang ka jana nungi agiteta bener oa liasü.

Ano school ka nungi kaketshir 25 nungi 30 tsungta

mena aliba rong ka mekepokba sülen yangjia nisung toku samar bushiba mapang lir, ta police tanishir Mir Rauf-i osangbener dang ashi.

November ita southern Sindh province kübok Sehwan region nung longren aser tzü atsünga aliba tzüchi ka nung minibus ka tsükoka nisung 20 asü.

June ita Balochistan nung passenger van ka longreni aluba lendong nung kibong ka nungi züngsem toku densema nisung 20 asü.

June ita Shirani, Balochistan province nung passenger mena aliba bus ka tenem lenmang nung tzünglu kanga sashia aruba mapang ajüzüka longreni ali aser iba mapang nisung 19 asü aser 12 yirua liasü.

Embassy amakba ajanga Azerbaijan den tesendaktep meraksatsüla: Iran

Tehran, Aenjeti/January 29 (Agencies): Iran Tir Ebrahim Raisi-i Azerbaijani tir den sensaksemba mapang, Tehran kübok Baku indang embassy amakba ajanga linük ana tsüngda tesendaktepdak meraksatsüla, ta shiogo. Iba lendong nung nisung ka asü.

Hokolbarnü nisung kati assault rifle ka bener embassy amak aser iba mapang security staff tekolakba yirutsü aser tanga mitkar ana yiruja liasü.

Raisi aser tir Ilham Aliyev na Honibarnü phone ajanga iba ken o sensaksemogo aser iba mapang Iran tir-i, asükhü lemsatepba den ken o bushisüngdangdar ta metetdaksü.

"Linük ana tsüngda tsükchitep adokdaksütsü atema inyaksangshir kar ajanga tesendaktep mejungi akümtsü atema Iran aser Azerbaijan sorkari memelatsü," ta Raisi-i ashiba pa indang official website ajanga metetdaksü.

Iran tir indang website ajangsa, Aliyev-i, "iba ya imla maliba tatalokba ka lir, saka iba dak sendakba nung linük anapronglai iba amala tatalokba amshia tesendaktep minprongtsü asoshi shinga nema maongka magidaksütsü asoshi inyaksüla," ta ashiba

sangdonga liasü.

Ajisüaka osang agütsüba nung Azerbaijani tir-i ayongzükbä indang kecha shisema mali, saka iba lendong ajanga Tehran aser Baku na tesendaktep mejungi kümdaksüba indang dang shisema lir.

Aliyev-i iba kiralongrar inyakyim ya kukua aitsüogo aser ashiba agi, meitkar tanabubai jenjang shidak magi asübo iba nisungba yagi embassy compound nung aliba staff aser parnok kinungertem tepseter lila, ta ashi.

Iran-i sayaba CCTV footage nung embassy amaksang ya pa indang gari nung mener aritepa aru aser embassy kima anena aliba gari ka dak oa atsük. Prangbong ka amer gari nungi aluba sülen pa kikümbang nung mena aliba Iran (unarmed) nung kameitkar ka süi ao aser embassy telungi injang khayonga ai. Azerbaijani nung mitkar ana dak akhaba mapang tasembubai pa dak ponglok aser pa sota liasü.

Aliyev-i iba tatalokba ya kiralongrar inyakyim ka ta ashiba den, foreign ministry-i Baku nung Iran envoy jaoka parnoki diplomatic staff tem anintsü ta ashi.

Kasa mapang nung Tehran nung ketdangsürtemi embassy amakba ya kiralongrar dak sendaka mali, aser nisungba yagi pa tejangraba nung iba embassy amak, ta ashi.

Embassy amaksang ya Yasin Hosseinzadeh tajangjaogo. Pa ya Iran indang state television-i interview agiogo aser pai ashiba agi, pa kinungtsü kümzüksü atema embassy telungi ai. Pai ashiba agi, pa kinungtsü ya küm ka shi tejangdang embassy telungi aiba sülen samadok.

Iranian state television-isa par chir ana den sensaksemogo, shirnok pai embassy yagi anir aru aser pai embassy amakba mapang tena gari nung mener liasü. Lar jalai ashiba agi, tetsü Baku-i meyipaogo, saka tebui la embassy nungsa lir ta bilemer.

Russia, Turkey aser United States densema linük aikati iba tatalokba aitsüogo aser tebandang kecha makai ken o b u s h i s ü n g d a n g t s ü ayongzükgogo.

Iran aser Azerbaijan na ita aika mangatettep adoka aruba mapang ka nung tang iba lendong atalokogo. Azerbaijan ya Turkey den kanga junga sendaktepa lir, shirnok Iran tsükchir lir.

SANGDONGER

Tir Yimyim Vol.XX no.106 (Adok 106), January 28,2023 tapak 7 nung 'Kelingmen village 22nd Arkakong Constituency nungi NDPP candidate Shri. Imnatiba yaritsü' ta nisung ishika tenüng agüja alirtem rongnung kü tenüng enoksema alibaji ni memeteti adoktsüba lir ta sangdonger. Nibo koba ABAM-i Clean election ayonga lir, idakji akangkanga nokdaka lir ta sangoktsür.

Sd/-
Rongsentoshi, Kelingmen.

SANGDONGER

Onok 26 Aonglenden Assembly Constituency NDPP Parent Body Active aser Primary Membership nungi anener aser tang election nung tokteptsü aliba taoba MLA Wb.Toshipokba Longkumer yaritsü lemteter:

- | | |
|-----------------------|------------------------|
| 1. Rongsentuba, | Information Secretary. |
| 2. Limawati, | V.President. |
| 3. Imtinungang, | G.Secretary. |
| 4. Tinu Pongen, | G.S. |
| 5. Nungshilemba, | GS. |
| 6. Repatoshi, | G.S. |
| 7. Sakulepden Imsong, | G.S. |
| 8. Imtitongzük, | V.P. |
| 9. Imtitemsü, | Joint Secretary. |
| 10. Nüngsangtuba, | Secretary. |
| 11. Jenluin, | Joint Secretary. |
| 12. Satemkaba, | General Secretary |
| 13. Kümsangtoba, | Youth Bhava, |

Sd/-
Rongsentuba
Information Secretary, 26 Aonglenden A.C

Netanyahu-i prangbong atema sentong tasen sangdong



Tel Aviv, Aenjeti/January 29

(Agencies): Occupied Palestinian territory nung azüdokshiba tali akumba mapang ka nung Israel nung prangbong aser injang amshitsü tezüpaba kümdaksüba sentongtem Ato Kilonser Benjamin Netanyahu-i sangdong, anungji iba mera ya arok merenshiba aser azüdokshi tali kümdaksütsü ama ajir.

Occupied East Jerusalem nung lendong agütsüba densema tesem anasü nung khatepba mechi par security cabinet senden ka amenba sülen Netanyahu-i iba sentong ya Honibar nikongdang sangdonga liasü.

Hokolbarnü East Jerusalem synagogue (Yihuda nung tekülem ki) anasa khatepba mapang nisung tenet asü.

Occupied West Bank kübok Jenin yimti nung Israel nungeri mita oa amakdang Palestine nung toku khaseta ano Israel aser Gaza tsungta khatepba ita tatemleni aruba mapang ka nung hopta tatemlen iba khatepba ya ataloka liasü.

Tan ita Israel sepaitemi Palestine nung nisung 32 tepsetogo.

Israel senso nem prangbong amshitsü temelaba tekeraba nung agütsütsü aser ozüng alema amshiba nok-nü

bendentsü tenzüksü, ta Netanyahu-i Honibarnü nangzüka liasü.

Kiralongra busemer temi takoksa jenjang tali jangjatsü mechi lendong agütsü südi ta temolung meleme alir indang ki idangjisa shibangtsütsü aser iba sülen raksatsütsü, ta paisa ashi.

Lendong agütsür kibongtem indang social security teyari tem agientsü, ta par office-i ashi.

Occupied West Bank nung ozüng alema oa alir Israel nung nem tashi agütsütsü asoshi mera tasen agitsü nangzük saka sentong tejangjabo melemsatep.

Occupied West Bank nung reinforcement atema sepaï battalion tali yoksemogo, ta Israel mitkar indang odongtar kati ashi.

National Security Minister Itamar Ben-Gvir densema par cabinet nung hardliner temi Netanyahu kanga ajungshia alitsü, ta angateter.

Tang Israel nung aliba sorkar ya Israel nung puti otsü nung right-wing timtiba alitsü.

Ben-Gvir ajanga prangbong amshitsü temelaba tali agütsütsü asoshi benok aser ano paisa kiralongrar nem tasüba temerenshi agütsütsü asoshia benoktsü, ta pai Honibarnü shia liasü.

Novak Djokovic-i Australian Open kokogo



Aenjeti/January 29, 2023 (Agencies): Deobarnü Australian Open tebur kija final asaya Novak Djokovic aser Stefanos Tsitsipas na asayaba Djokovic-i kokogo.

Rod Laver Arena nung final asaya ya Djokovic-i 6-3, 7-6 (4), 7-6 (5) agi straight set nung koka liasü.

Iba asaya akokba sülen Djokovic-i ano otsü tasen yanglushia iba asayamung 10benbuba kokogo aser pa ATP rankings nung temaba jenjangi tuogo.

Serbia nung asayar ya taoba küm COVID-19 vaccine magiba ajanga Australia nungi meyipa yok aser ibayongji Australian Open nung shilem magiteti liasü.

Tangbo sorkari tenokdangba balala agütsür aliba agintsüogo aser vaccine magiaka pa nem visa agüja takumbo iba asayamung nung shilem agitetogo.

Iba asaya akokba sülen Djokovic iba hard-court asayamung nung asaya 28 tashi nung khen danga tamakok mongui asayadar.

Kasa mapang nung iba asayamung akokba densema pai tang tashi nung Grand Slam 22 kokteta lir, kong Wimbledon tenet, U.S. Open asem aser French Open ana densema lir. Tebur asayatem ronungi Rafael Nadal-i Grand Slam 22 ana kokteta pa ajak dang timba aliba tang Djokovic-i menepogo.

Final nung asaya tetenzük nungi Djokovic asaya amokbanger asaya aser talisa tiebreaker ana asayaba nung pai Tsitsipas dang nungi tajungba asayateta liasü.

Mezüngbuba tiebreaker nung Djokovic 4-1 agi tejakdang liasü aser 4-4 aküm, iba sülen pai point asem atonga ngua akok. Tanabuba tiebreaker nung pa 5-0 agi tejakdang liasü aser pai asaya ayong ayonga akok.

Kasa mapang nung tetsürtem rongnungi Margaret Court 24, Serena Williams 23, aser Steffi Graf 22 nungeri Grand Slam timtiba koka lir.

Djokovic asoshi taküm Australia Open akokba ya ATP tour-level title 93buba lir, pa jenjang pezübuba nung Nadal den kasa lir. Teburtem rongnungi Jimmy Connors-i (109) ATP tour-level title timba koka lir.

Djokovic tang agi Grand Slam final 33buba nung shilem agir liasü aser Tsitsipas atema tanabuba liasü. Arishi küm 24 tain Greece nung asayar ya 2021 küma French Open final nung Djokovic-i koka liasü.

Iba asaya akok asübo Tsitsipas tang mezüngbuba No. 1 kümer lila. Melbourne nung Djokovic makokba ya Tsitsipas asoshi kecha takoksa masü, kechiyong Nadal-i clay nung kanga junga asayaba ama hard court nung Djokovic akoktsüji temela masü.

Sports Ministry-i Khelo India Youth Games atema App lapoktsü

New Delhi, Aenjeti/January 29 (Agencies): Taruba Khelo India Youth Games nung shilem agiba asayatem atema Sports Ministry-i mobile application ka lapoktsüogo.

Iba asayamung ya Bhopal nung January 30 nungi February 11 tashi asayatsü.

Iba mobile application ajanga asayamung indang osang ajak button ka dang anem nung agütsütsü.

Application ajangsa asaya metenzük tsüngda asayatem nem pa mesüra la indang verified documents tem upload sütsü mesütsü aji reprangdangtsü atema maongka agütsütsü.

Asayatem tenung takok ngua züngoksemba sülen asayatem parnok nem sporting kits agütsü magütsü iba idang reprangtetsü, asayar tem koba

hotel nung anenzüktsü, hotel nungi asayaba tesemi olioratsü atema transportation sentong reprangtetsü aser iba den jongdak mapang teyari meshitsü atema tongtibang contact number tema iba app nung angütsü.

Khelo India School Games mezüngbuba 2018 küm asaya aser tanabuba ya 2019 küm "Khelo India Youth Games" ta nungja melener asaya-a liasü.

Taküm iba asayamung ya January 30 nungi February 11 tashi Madhya Pradesh nung asayatsü. Taküm iba asayamung nung linük ajanga nungi lanur asayar 5000 dak tema adenshia asayatsü imlar.

Iba asayamung nung asayatem asaya 27 tashi nung tokteptsü, kong athletics, archery aser rowing nung amala asayatem densema lir.

Chelsea-i Malo Gusto alizükogo



Aenjeti/January 29, 2023 (Agencies): January transfer window shibangtsü lia Chelsea-i Olympique Lyonnais nungi

right back Malo Gusto alizükogo aser pa iba French club nungi season tembanga asayatsü atema loan nung yokogo, ta Premier League club yagi Deobarnü sangdong ka ajanga metetdaksü.

Malo Gusto den 2030 tashi Chelsea nungi asayatsü atema tenangzüktepba ka yangluogo, ta kasa sangdong ajanga metetdaksü.

Gusto, shiba France indang under-21 team nung asayaogo, pa tang tasayadak aliba season nung Ligue 1 nung 15 ben asayaogo. Arishi küm 19 tain asayar ya taoba season nungi tenzüka club nungi asaya arudar.

Club-i Pa alizükba taa indang osang tejangja magütsü,

ajisiüaka Sky Sports-i ashiba agi pa pound million 26.3 yong alizükogo.

"Defender ya maneni loan nung oa Groupama Stadium nung asayatsü aser taruba küm lemluwa season tasen tenzüka mapang club nung arua adentsü," ta Chelsea-i sangdong ka ajanga metetdaksü.

Gusto densema Chelsea-i mid-season transfer window nung asayar tenet alizükogo. London club yagi Mykhailo Mudryk, Benoit Badiashile, Noni Madueke, Andrey Santos aser David Fofana alizükogo aser Atletico Madrid nungi Joao Felix loan nung anir arua lir.

Premier League nung Chelsea pur tang jenjang 10buba nung lir aser parnok temaba jenjang nung aliba team dang nungi point 10 agi tejemba lir. Parnok taruba asaya Fulham den Hokolbarnü asayatsü.

Gujarat Giants' mentor asütsü Mithali Raj shim



Ahmedabad, Aenjeti/January 29 (Agencies): Taoba mapang India tetsür team captain Mithali Raj, Women's Premier League (WPL) club Gujarat Giants puri mentor aser advisor asütsü atema shimogo. Iba asayamung ya taküm mezüngbuba March-April ita nung asayatsü.

Mithali ya tetsür international cricket asaya nung run timtiba yangluba asayar lir aser la küm 23 tashi asayaba sülen taoba küm cricket asaya ajak nungi anenogo.

Club indang mentor ka ama arishi küm 40 tain cricket asayar yagi tetsür cricket ajungketba nung teyari agütsütsü aser Gujarat nung iba asaya grassroots level nungi

renlokyonga aoba nung teyari agütsütsü.

Tawa auction agiba mapang team pongu rongnungi Ahmedabad franchise ya ajak dang sen tasaktiba agi ayok. Iba club ya Adani Sportsline-i sen crore 1289 agi alizüka liasü.

Mithali-i ashiba agi, BCCI inyakyim tasenba ajanga tetsür cricket asaya renloka aoba nung teyari agütsütsü aser lanur asayatem professional ama cricket asayatsü atema ajungmesotsü.

"Women's Premier League mezüngbuba ya tetsür cricket asaya atema jenjang tajung ka aser Adani Group dena densema ajanga iba asaya ajungkettsü," ta Mithali-i ashi.

"Tetsürtem cricket asaya

tanem tanemi renloka odar aser iba amala inyakyim ajanga tetsür chanutem professional cricket asayatsü atema ajungmesotsü.

"Corporates temi shilem agiba ajanga inyakyim takaraba aotsü aser tarutsü nung India nem konang tetushi bener arutsütsü. Iba ajanga tetsür asayatem nem maongka timba agütsütsü," ta lai ashi.

Adani Enterprises director Pranav Adani-i, Mithali ya role model k aser lai shilem agiba ajanga cricket asaya nung dang masü saka tanga asaya nunga lanur asayatem atsüa aruba nung teyari agütsütsü, ta ashi.

"Mithali Raj ya lanurtem atema role model ka aser onok indang tetsür cricket team mentor asütsü shimba atema kanga pelar," ta Pranav-i ashi.

"Mithali amala international jenjang nung nungtuogo asayar ka densema ajanga lanurtem cricket asaya nung dang masü saka tanga asaya nunga shilem agütsü atema ajungmesotsü aser iba ajanga professional sports ecosystem nung temelenshi adoktsü ta amanger," ta paisa ashi.

BILEMDANGANG

"O-bo mamangtsü akok saka inyaka sayura amangtsü."